

120

B946.5

H27

河北禅学研究所编

禪宗寶典

吳主民敬題



全國圖書館文獻縮微复制中心



A0487198

中国佛学经典丛刊

禅宗宝典

编辑 河北禅学研究所

主编 林明珂、申国美

出版 全国图书馆文献缩微复

制中心（北京文津街七号）

发行 新华书店北京发行所

印刷 北京通县大中印刷厂

出版日期 一九九三年十二月

印数 五〇〇

定价 一〇〇元

新学佛学

菩提达磨大师略辨大乘
入道四行观一卷

梁·菩提达磨说

菩提達磨大師略辨大乘入道四行觀

弟子 曇琳 序

法師者西域南天竺國人是婆羅門國王第三之子也神慧疎朗聞皆曉悟志存摩訶衍道故捨素隨繻紹隆聖種冥心虛寂通鑒世事內外俱明德超世表悲悔邊隅正教陵替遂能遠涉山海遊化漢魏亡心之士莫不歸信存見之流乃生譏謗于時唯有道育惠可此二沙門年雖後生俊志高遠幸逢法師事之數載虔恭諮啓善蒙師意法師感其精誠誨以真道令如是安心如是發行如是順物如是方便此是大乘安心之法令無錯謬如是安心者壁觀如是發行者四行如是順物者防護譏嫌如是方便者遣其不著此略序所由云爾

夫入道多途要而言之不出二種一是理入二是行入理入者謂藉教悟宗深信含生同一真性但爲客塵妄想所覆不能顯了若也捨妄歸真凝住壁觀無自無他凡聖等一堅住不移更不隨文教此即與理冥符無有分別寂然無爲名之理入行入謂四行其

餘諸行悉入此中何等四耶一報冤行二隨緣行三無所求行四稱法行云何

報冤行謂修道行人若受苦時當自念言我往昔無數劫中棄本從末流浪諸有多起冤憎違害無限今雖無犯是我宿殃惡業果熟非天非人所能見與甘心甘受都無冤訴經云逢苦不憂何以故識達故此心生時與理相應體冤進道故說言報冤行

二隨緣行者衆生無我並緣業所轉苦樂齊受皆從緣生若得勝報榮譽等事是我過去宿因所感今方得之緣盡還無何喜之有得失從緣心無增減喜風不動冥順於道是故說言隨緣行

三無所求行者世人長迷處處貪著名之爲求智者悟真理將俗反安心無爲形隨運轉萬有斯空無所願樂功德黑暗常相隨逐三界久居猶如火宅有身皆苦誰得而安了達此處故捨諸有止想無求經曰有求皆苦無求即樂判知無求眞爲道行故言無所求行

四稱法行者性淨之理目之爲法此理衆相斯空無

染無著無此無彼經曰法無衆生離衆生垢故法無
有我離我垢故智者若能信解此理應當稱法而行
法體無慳身命財行檀捨施心無慳惜脫解三空不
倚不著但爲去垢稱化衆生而不取相此爲自行復
能利他亦能莊嚴菩提之道檀施既爾餘五亦然爲
除妄想修行六度而無所行是爲稱法行

達磨大師四行觀終

附達磨大師碑頌

楞伽山頂坐寶日
形同大地體如空
匪磨匪瑩恒淨明
芬陀利花用嚴身
不有不無非去來
實哉空哉離生有
刹那而登妙覺心

梁武帝蕭衍
中有金人披縷褐
心如琉璃色如雪
披雲卷霧心且徹
隨緣觸物常大悅
多聞辨才無法說
大之小之衆緣絕
躍麟慧海起先哲

理應法水永長流
圓龍珠內落心燈
生途忽鳥慧眼閉
無去無來無是非
住鳥去鳥皆歸寂
用之執手以傳燈
有能至誠心不疑
一眞之法盡可有

何期暫涌還電湧
白毫慧刃當鋒欽
禪河駐流法梁折
彼此形體心碎裂
寂內何曾存哽咽
生死去來如電掣
劫火燃燈斯不滅
未悟迷途茲是竭

达磨大师血脉论一卷

梁·菩提达磨说

達磨血脉論序

右朝奉郎通判建昌軍事賜緋魚袋任哲作

原人之心皆具佛性。泛觀諸家禪說。一切經文。原其至當之理。未有不言自己性中本來真佛。達磨西來。直指人心。見性成佛。蓋謂自己真佛。不出一性之中。人人不自委信。所以向外馳求。將謂自性真佛。外更有別佛。故諸佛諸祖師說法。要人省悟自己本來真佛。不假外求。又緣種種法語。泛濫不一。轉使學人惑亂。本性無悟入處。惟有達磨血脉論。並黃檗傳心法要二說。最爲至論。可以卽證自己佛性。使人易曉。比之求師訪道。鑽尋故紙。坐禪行脚。狂費工夫。相去萬倍。此非小補。紹興癸酉。見獨老人任哲序。

達磨大師血脉論

三界混起。同歸一心。前佛後佛。以心傳心。不立文字。問曰。若不立文字。以何爲心。答曰。汝問吾卽是汝心。吾答汝卽是吾心。吾若無心。因何解答。汝若無心。

因何解問。吾問吾卽是汝心。從無始曠大劫以來。乃至施爲運動一切時中。一切處所。皆是汝本心。皆是汝本佛。卽心是佛。亦復如是。除此心外。終無別佛。可得離此心外。覓菩提涅槃。無有是處。自性真實。非因非果。法卽是心。義自心是涅槃。若言心外有佛。及菩提可得。無有是處。佛及菩提。皆在何處。譬如有人以手提虛空。得否。虛空但有名。亦無相。自取不得。捨不得。是捉空不得。除此心外。見佛終不得也。佛是自心。作得。因何離此心外。覓佛。前佛後佛。只言其心。心卽是佛。佛卽是心。心外無佛。佛外無心。若言心外有佛。佛在何處。心外既無佛。何起佛見。迺相誑惑。不能了本心。被它無情物。攝無自由。若也不信。自誑無益。佛無過患。衆生顛倒。不覺不知。自心是佛。若知自心是佛。不應心外覓佛。佛不度佛。將心覓佛。不識佛。但是外覓佛者。盡是不識自心。是佛。亦不得將佛禮佛。不得將心念佛。佛不誦經。佛不持戒。佛不犯戒。佛無持犯。亦不造善惡。若欲覓佛。須是見性。見性卽是佛。若不見性。念佛誦經。持齋持戒。亦無益處。念佛得因果。

誦經得聰明持戒得生天布施得福報。覓佛終不得也。若自己不明。了須參善知識。了却生死根本。若不見性。即不名善知識。若不如此。縱說得十二部經。亦不免生死輪迴。三界受苦。無出期時。昔有善星比丘。誦得十二部經。猶自不免輪迴。緣爲不見性。善星既如此。今時人講得三本經論。以爲佛法者。愚人。也。若不識得自心。誦得閑文書都無用處。若要覓佛。直須見性。性卽是佛。佛卽是自在。人無事。無作人。若不見性。終日茫茫向外馳求。覓佛元來不得。雖無一物可得。若求會亦須參善知識。切須苦求。令心會解。生死事大。不得空過。自誑無益。縱有珍珠如山。眷屬如恒河沙。開眼卽見合眼還見麼。故知有爲之法。如夢幻等。若不急尋師。空過一生。然卽佛性自有。若不因師。終不明了。不因師悟者。萬中希有。若自己以緣會合得聖人意。卽不用參善知識。此卽是生而知之勝學也。若未悟解。須勤苦參學。因教方得悟。若未悟了。不學亦得。不同迷人不能分別。皂白妄言宣佛勸誘。佛忌法如斯等類。說法如雨。盡是魔說。卽非佛說。師

八
入

是魔王弟子。是魔民。迷人任它指揮。不覺墮生死海。但是不見性人。妄稱是佛。此等衆生。是大罪人。誑它一切衆生。令人魔界。若不見性。說得十二部經。教盡是魔說。魔家眷屬。不是佛家弟子。既不辨皂白。憑何免生死。若見性。卽是佛。不見性。卽是衆生。若離衆生。性別有佛性。可得者。佛今在何處。卽衆生。性卽是佛性也。性外無佛。佛卽是性。除此性外。無佛可得。佛外無性可得。

問曰。若不見性。念佛誦經。布施持戒。精進廣興福利。得成佛否。答曰。不得。又問。因何不得。答曰。有少法可得。是有爲法。是因。果是受報。是輪迴。法不免生死。何時得成佛。道成佛。須是見性。若不見性。因果等語。是外道法。若是佛。不習外道法。佛是無業人。無因果。但有少法可得。盡是傍佛。憑何得成。但有住著一心。一能一解。一見佛。都不許佛。無持犯心。性本空。亦非垢淨。諸法無脩。無證。無因。無果。佛不持戒。佛不脩善。佛不造惡。佛不精進。佛不懈怠。佛是無作人。但有住著心。見佛卽不許也。佛不是佛。莫作佛解。若不見此義。

一切時中一切處處皆是不了本心。若不見性。一切時中。撥作無作。想是大罪人。是癡人。落無記空中。昏昏如醉人。不辨好惡。若撥修無作法。先須見性。然後息緣慮。若不見性。得成佛道。無有是處。有人撥無因果。熾然作惡業。妄言本空。作惡無過如此之人。墮無間黑暗地獄。永無出期。若是智人。不應作如是見解。問曰。既若施爲運動。一切時中。皆是本心。色身無常之時。云何不見本心。答曰。本心常現前。汝自不見。問曰。心既見在。何故不見。師曰。汝曾作夢否。答曾作夢。問曰。汝作夢之時。是汝本身否。答是本身。又問。汝言語施爲運動。與汝別不別。答曰。不別。師曰。既若不別。卽此身是汝本法身。卽此法身是汝本心。此心從無始曠大劫來。與如今不別。未曾有生死。不生不滅。不增不減。不垢不淨。不好不惡。不來不去。亦無是非。亦無男女相。亦無僧俗老少。無聖無凡。亦無佛亦無衆生。亦無修證。亦無因果。亦無筋力。亦無相貌。猶如虛空。取不得。捨不得。山河石壁。不能爲礙。出沒往來。自在神通。透五蘊山。渡生死河。一切業拘此

法身。不得此心。微妙難見。此心不同色心。此心是人皆欲得見。於此光明中。運手動足者。如恒河沙。及乎問著總道。不得。猶如木人相似。總是自己受用。因何不識。佛言。一切衆生。盡是迷人。因此作業。墮生死河。欲出還沒。只爲不見性。衆生若不迷。因何問著其中。事無有一人得會者。自家運手動足。因何不識。故知聖人語不錯。迷人自不會曉。故知此難明。惟佛一人能會此法。餘人天及衆生等。盡不明了。若智慧明了。此心號名法性。亦名解脫。生死不拘。一切法拘它不得。是名大自在。王如來亦名不思議。亦名聖體。亦名長生不死。亦名大仙名。雖不同體。卽是一聖人。種種分別。皆不離自心。心量廣大。應用無窮。應眼見色。應耳聞聲。應鼻嗅香。應舌知味。乃至施爲運動。皆是自心。一切時中。但有語言道斷。卽是自心。故云。如來色無盡。智慧亦復然。色無盡是自心。心識善能分別一切。乃至施爲運用。皆是智慧。心無形相。智慧亦無盡。故云。如來色無盡。智慧亦復然。四大色身卽是煩惱色身。卽有生滅法。身常住無所住。如來法身常不變。

異故經云。衆生應知佛性。本自有之。迦葉只是悟得本性。本性卽是心心。卽是性性。卽此同諸佛心。前佛後佛。只傳此心。除此心外。無佛可得。顛倒衆生。不知自心。是佛。向外馳求。終日忙忙。念佛禮佛。佛在何處。不應作如是等見。但知自心心外。更無別無。經云。凡所有相。皆是虛妄。又云。所在之處。卽爲有佛。自心是佛。不應將佛禮佛。但是有佛及菩薩相貌。忽爾見前。切不用禮敬我。心空寂。本無如是相。自若取相。卽是魔。盡落邪道。若是幻從心起。卽不用禮禮者。不知知者。不禮禮被魔攝。恐學人不知。故作是辨。諸佛如來。本性體上。都無如是相。自切須在意。但有異境界。切不用採括。亦莫生怕怖。不要疑惑我。心本來清淨。何處有如許相。自乃至天龍夜叉鬼神帝釋梵王等相。亦不用心生敬重。亦莫怕懼我。心本來空寂。一切相自皆是妄相。但莫取相。若起佛見法見及佛菩薩等相。自而生敬重。自墮衆生位中。若欲直會。但莫取一切相。卽得更無別語。故經云。凡所有相。皆是虛妄。都無定實。幻無定相。是無常法。但不取相。合它聖意。故

經云。離一切相。卽名諸佛。

問曰。因何不得禮佛菩薩等。答曰。天魔波旬阿脩羅。示見神通。皆作得菩薩相。自種種變化。是外道。總不是佛。佛是自心。莫錯禮拜。佛是西國語。此土云。覺性。覺者。靈覺。應機接物。揚眉瞬目。運手動足。皆是自己靈覺之性。性卽是心心。卽是佛。佛卽是道道。卽是禪禪之一字。非凡聖所測。又云。見本性爲禪。若不見本性。卽非禪也。假使說得千經萬論。若不見本性。只是凡夫。非是佛法。至道幽深。不可話會。典教憑何所及。但見本性一字。不識亦得見性。卽是佛。聖體本來清淨。無有雜穢。所有言說。皆是聖人從心起用。用體本來空。名言猶不及十二部經。憑何得及道本圓成。不用脩證。道非聲色。微妙難見。如人飲水。冷暖自知。不可向人說也。唯有如來。能知餘人天等類。都不覺知。凡夫智不及。所以有執相。不了自心。本來空寂。妄執相及一切法。卽墮外道。若知諸法從心生。不應有執。執卽不知。若見本性。十二部經。總是閑文字。千經萬論。只是明心。言下契會。教將何用。至理絕言。教是語。

詞實不是道道本無言。言說是妄。若夜夢見樓閣宮殿象馬之屬及樹木叢林池亭如是等相。不得起一念樂著。盡是托生之處。切須在意。臨終之時。不得取相。即得除障。疑心。瞥起。即魔攝法。身本來清淨。無受只緣。迷故不覺。不知因茲。故妄受報。所以有樂著不得自在。只今若悟得本來身心。即不染習。若從聖入。凡示見種種雜類。自爲衆生。故聖人逆順。皆得自在。一切業。拘它不得。聖成久有大威德。一切品類。業被它聖人轉。天堂地獄。無奈何它。凡夫神識昏昧。不同聖人。內外明徹。若有疑。即不作。作即流浪。生死後悔。無相救處。貧窮困苦。皆從妄想。生若了是心。通相勸。勉。但無作。而作。即入如來知見。初發心人。神識總不定。若夢中頻見異境。輒不用疑。皆是自心起。故不從外來。夢若見光明出現。過於日輪。即餘習。頓盡。法界性見。若有此事。即是成道之因。唯自知。不可向人說。或靜園林中。行住坐臥。眼見光明。或大或小。莫與人說。亦不得取。亦是自性光明。或夜靜暗中。行住坐臥。眼睹光明。與晝無異。不得怪。並是自心欲明顯。或夜

◆切要功

夢中見星月分明。亦自心諸緣欲息。亦不得向人說。夢若昏昏。猶如陰暗中。行亦是自心煩惱障重。亦自知。若見本性。不用讀經念佛。廣學多知。無益。神識轉昏。設教只爲標心。若識心何用。看教若從凡入聖。即須息業養神。隨分過日。若多嗔恚。令性轉與道相違。自賺無益。聖人於生死中。自在出沒。隱顯不定。一切業。拘它不得。聖人破邪魔。一切衆生。但見本性。餘習頓滅。神識不昧。須是直下。便會。只在如今。欲真會道。莫執一切法。息業養神。餘習亦盡。自然明白。不假用。切外道不會佛意。用功最多。違背聖意。終日驅驅念佛。轉經。昏於神性。不免輪迴。佛是閑人。何用驅驅。廣求名利。後時何用。但不見性。人讀經念佛。長學精進。六時行道。長坐不臥。廣學多聞。以爲佛法。此等衆生。盡是謗佛。法人前。佛後。佛只言見性。諸行無常。若不見性。妄言我得阿耨菩提。此是大罪。入十大弟子。阿難多聞中。得第一。於佛無識。只學多聞。二乘外道。皆無識。佛識數脩證。墮在因果中。是衆生業報。不免生死。遠背佛意。即是謗佛。衆生殺却無罪。過經云。闍提

人不生信心殺却無罪過。若有信心。此人是佛位人。若不見性。卽不用取次。謗它良善。自賺無益。善惡歷然。因果分明。天堂地獄。只在眼前。愚人不信。現墮黑暗地獄中。亦不覺不知。只緣業重。故所以不信。譬如無目人。不信道有光明。縱向伊說。亦不信。只緣盲故。憑何辨得。日光愚人。亦復如是。現今墮畜生雜類。誕在貧窮下賤。求生不得。求死不得。雖受是苦。直問著。亦言我今快樂。不異天堂。故知一切衆生。生處爲樂。亦不覺不知。如斯惡人。只緣業障重。故所以不能發信心者。不自由它也。若見自心是佛。不在剃除鬚髮。白衣亦是佛。若不見性。剃除鬚髮亦是外道。

問曰。白衣有妻子。淫欲不除。憑何得成佛。答曰。只言見性。不言淫欲。只爲不見性。但得見性。淫欲本來空寂。自爾斷除。亦不樂著。縱有餘習。不能爲害。何以故。性本清淨。故雖處在五蘊色身中。其性本來清淨。染汚不得。法身本來無受。無飢。無渴。無寒。熱。無病。無恩愛。無眷屬。無苦。樂。無好。惡。無短。長。無強。弱。本來無有一物可得。只緣執有此色身。因卽有飢渴寒熱瘡病。

等相若不執。卽一任作。若於生死中得自在。轉一切法。與聖人神通自在。無礙無處不安。若心有疑。決定透一切境界。不過不作最好。作了不免輪迴生死。若見性。旃陀羅亦得成佛。

問曰。旃陀羅殺生作業。如何得成佛。答曰。只言見性。不言作業。縱作業不同。一切業拘不得。從無始曠大劫來。只爲不見性。墮地獄中。所以作業輪迴生死。從悟得本性。終不作業。若不見性。念佛免報不得。非論殺生命。若見性。疑心頓除。殺生命亦不奈它。何。自西天二十七祖。只是迦傳心印。吾今來此土。唯傳頓教。大乘卽心是佛。不言持戒精進苦行。乃至入水火。登於劍輪。一食長坐。不臥盡。是外道有爲法。若識得施爲運動靈覺之性。汝卽諸佛心。前佛後佛。只言傳心。更無別法。若識此法。凡夫一字不識。亦是佛。若不識自己靈覺之性。假使身破如微塵。覓佛終不得也。佛者亦名法身。亦名本心。此心無形相。無因果。無筋骨。猶如虛空。取不得。不同質礙。不同外道此心。除如來一人能會。其餘衆生。迷人不明了。此心不離四大色。

身中若離是心。卽無能運動。是身無知。如草木瓦礫。身是無性。因何運動。若自心動。乃至語言施爲運動。見聞覺知。皆是動心。動用動是心動。動卽其用。動用外無心。心外無動。動不是心。心不是動。動本無心。心本無動。動不離心。心不離動。動無心。離心無動。離動是心用。用是心動。動卽心用。用卽心動。不動不用。用體本空。空本無動。動用同心。心本無動。故經云。動而無所動。終日去來而未嘗去。終日見而未嘗見。終日咲而未嘗咲。終日聞而未嘗聞。終日知而未嘗知。終日喜而未嘗喜。終日行而未嘗行。終日住而未嘗住。故經云。言語道斷。心行處滅。見聞覺知。本自圓寂。乃至嘔喜痛痒。何異木人。只緣推尋痛痒。不可得。故經云。惡業卽得苦報。善業卽有善報。不但嘔墮地獄。喜卽生天。若知嘔喜性空。但不執卽業脫。若不見性。講經決無憑說。亦無盡略。標邪正如是不及一二也。

頌曰

心心心難可尋。寬時偏法界。窄也不容針。我本求心不求佛。了知三界空。無物若欲求佛。但求心。只這心。

這心是佛。我本求心心自持。求心不得待心知。佛性不從心外得。心生便是罪生時。

偈曰

吾本來此土 傳法救迷情 一華開五葉 結果自然成

達磨大師血脉論終

达磨大师悟性论一卷

梁·菩提达磨说